

**KERATAN AKHBAR-AKHBAR TEMPATAN  
TARIKH: 23 JANUARI 2016 (SABTU)**

<b>Bil</b>	<b>Tajuk</b>	<b>Akhbar</b>
1	PM lancar iComm untuk tingkat taraf hidup, keselamatan penduduk	Bernama.com
2	Kg Padang Rumbia komuniti desa pertama terima iComm	Sinar Online
3	iComm system to enhance living standards and security of residents, Najib says	The Malay Mail
4	iComm beri peluang penduduk luar bandar tingkat pengetahuan dan ekonomi	Bernama.com
5	MOSTI rancang perluas MSI ke kawasan luar bandar	Sinar Online
6	iComm beri peluang penduduk luar bandar tingkat pengetahuan dan ekonomi	Borneo Post Online
7	Najib launches infrastructure system aimed at rural areas	The Malaysian Insider
8	PM wants iComm system expanded throughout rural areas	New Straits Times
9	Ais terbentuk dari awan ribut petir gagal mencair	Berita Harian
10	Amaran angin kencang di perairan Sabah dan Labuan bermula ahad hingga rabu	Bernama.com
11	Kementerian sangkal dakwaan tidak pedulikan perlombongan bauksit di Pahang	Bernama.com



## PM Lancar iComm Untuk Tingkat Taraf Hidup, Keselamatan Penduduk



Najib Tun Razak melihat paparan skrin mengenai sistem tebatan banjir yang sentiasa dikemaskini ketika merasmikan projek perintis Sistem Prasarana Komuniti Pintar (iComm) Kampung Padang Rumbia

PEKAN, 23 Jan (Bernama) -- Perdana Menteri Datuk Seri Najib Tun Razak hari ini melancarkan projek Sistem Prasarana Komuniti Pintar (iComm) untuk meningkatkan taraf hidup dan keselamatan rakyat.

Kampung Padang Rumbia di sini dipilih sebagai projek perintis iComm.

Najib berkata, projek itu yang pertama seumpamanya di rantau ini, bakal diperluaskan ke seluruh negara untuk memastikan masyarakat luar bandar turut bersama-sama penduduk bandar menikmati ledakan arus teknologi maklumat dan komunikasi (ICT).





Katanya sistem itu yang dilengkapi sistem rangkaian kamera litar tertutup (CCTV), alat pemantau paras air sungai dan platform sistem komunikasi mudah alih berasaskan internet juga mampu mengawasi sempadan negara daripada sebarang ancaman pencerobohan.

"Kita boleh pasang sistem iComm ini di timur Sabah seperti di Lahad Datu, Semporna, dan Sandakan. Melalui CCTV yang dipasang kita dapat mengesan kehadiran sebarang anasir luar yang cuba menceroboh negara ini.

"Sistem ini secara langsung memberikan banyak manfaat bukan sahaja kepada rakyat tetapi juga kepada kerajaan," katanya ketika berucap merasmikan projek perintis iComm di Kampung Padang Rumbia, hari ini.



Turut hadir **Menteri Sains, Teknologi dan Inovasi Datuk Seri Wilfred Madius Tangau, Presiden dan Ketua Pegawai Eksekutif Mimos Berhad Datuk Abdul Wahab Abdullah** dan Anggota Dewan Undangan Negeri Bebar Mohammad Fakhruddin Mohd Ariff.

Projek tersebut merupakan satu inisiatif di bawah program inovasi sosial **Kementerian Sains, Teknologi dan Inovasi (Mosti)** dibangunkan melalui agensi penyelidikan dan pembangunannya Mimos Sdn Bhd untuk menaik taraf sistem komunikasi masyarakat setempat.

Najib berkata, masyarakat di Kampung Padang Rumbia seharusnya berbangga kerana sistem tersebut mula diperkenalkan di kampung tersebut dan mereka dapat menikmati capaian internet percuma selain panggilan telefon percuma.

"Kampung ini juga dilengkapi dengan 10 CCTV yang membolehkan setiap apa yang berlaku di kampung ini diawasi selain dilengkapi dengan sistem amaran banjir yang canggih. Projek ini membolehkan penduduk Padang Rumbia mengecapi gaya hidup yang berbeza dari masa lalu," katanya.

Menurutnya, senario itu juga mencerminkan dengan jelas kehendak pembangunan di luar bandar kini berbeza jika hendak dibandingkan semasa ayahanda beliau, Allahyarham Tun Abdul Razak Hussein menjadi perdana menteri. "Kalau kita menyorot kembali era pimpinan Allahyarham Tun Razak (perdana menteri kedua), kita boleh bayangkan corak pembangunan luar bandar ketika itu amat berbeza kerana semasa itu kita mahu kemudahan asas seperti bekalan elektrik, air, jalan raya, balai raya dan lembu pawah.

"Kini masa telah berlalu, negara semakin jauh ke hadapan, kemajuan dunia dalam bidang sains dan teknologi telah membuka era baharu di zaman yang dikenali sebagai era maklumat dan K-ekonomi.

"Pembangunannya berteras pengetahuan, sains dan teknologi dan menjadi teras kepada kejayaan sesebuah negara dan kerajaan akan pastikan seluruh pelusuk negeri tidak ketinggalan dalam soal itu" kata Perdana Menteri.

